



13
1787
31



48
1787
卷 31

事言要玄卷之六

集賢院

類聚唐開元十三年召學士張說等宴於集仙殿於是改殿爲集賢殿改麗正脩書院爲集賢殿書院五品以上爲學士六品以下爲直學士元年四年復置集賢校理宋太平興國二年始建崇文院昭文館集賢院皆總爲崇文院

六帖唐藏書之地有昭文崇文之館有集賢書院有脩文弘文昭文以至蓬萊書殿曰乾元脩書院曰秘書內外省曰內庫曰三館曰秘書秘府曰蘭臺麟室

開元中賜錢一千貫文以充食本時院內供擬稍厚中書舍人陸堅亦充翰林供奉每日入院堅以學士或非其人而所司祇



供優厚將為糜費將建議請一切罷之燕公明之曰自古帝王
功成理定則有奢縱之戒豈如今日聖上崇儒重道親自講諷
刊校圖書詳延學者今日麗正即是聖主禮樂之司永代模楷
不易之道也所費者小所益者大陸子之言未為達也

張說等因獻賦詩上各賜贊以美之 張說德重和鼎功踰濟

川詞林秀逸翰苑光輝 徐堅校文天祿論經上庠草詞宛麗

雄辨柳楊 賀知章禮樂之司文章之苑學優藝博才思高遠

趙冬曦白簡端嚴青史良直清詞雅韻博覽強識 康子元

才識清遠言談幽秘四科文學六書仁義 侯行果洪鍾佇叩

明鏡不疲蒐彙係象動中威儀 韋述職參山甫業纂玄成六

藝述作四始飛英 敬會真名乃會真迹惟契道桓衣講習臨

從振藻 趙玄默才比丘明學無儒墨敘述微婉講論道德

東方穎地遊天祿門刪滑稽三冬足用六藝斯齊 李子釗干

木流度指樹貽芳諷諫遺闕啓發篇章 呂向族茂飛熊才方

班馬考理篇籍抑揚風雅 母臧軒轅之任諫諍之職聞詩聞

禮有才有識 陸去泰才光於晉價重於張州縣斯屈文翰尤

長 咸廩業郁郁高文英英博識持我刑憲是稱諒直 余欽

文章兩贍才術兼美思在窮經專學舊史 孫季良蓬山之秀

芸閣之英雄詞卓傑雅思縱橫 時又頻賜酒饌學士等讌

飲為樂前後賦詩奏上凡數百首時院內既有宰相及侍講屢

承恩渥賜以甘瓜綠李及四方珍異燕公書曰東壁圖書府西

垣翰墨林誦詩聞國政講易見天心當時詞人稱羨

貞觀中集賢學士甚衆會詔問神策軍建立之由相府討求不知所出諸學士悉不能對乃訪於蔣乂乂徵引根源甚詳悉宰臣高郢鄭珣瑜相顧曰集賢有人矣翌日詔兼判集賢院事乂祖瓌開元中弘文館學士乂將明集賢殿學士父子代爲學士儒者榮之

常衮詩穆穆上清居沉沉中秘書金鎖深內殿石甃淨寒渠花樹臺斜倚宮烟閣半虛縹囊披錦繡翠軸捲瓊瑤墨潤水文象香銷蠹子魚舊德雙遊處聯芳十載餘北朝榮庾薛西漢盛嚴徐侍講親華宸微吟步綺踈綴簾金翡翠賜視玉蟾蜍

類聚後漢有東觀魏有崇文館宋有玄史二館南齊有總明館梁有士林館北齊有文林館後周有崇文館皆著撰文史鳩聚學徒之所也唐武德初置修史館九年改爲弘文館貞觀元年詔京官職事五品以上子嗜書者二十四人隸館習書出禁中書法以授之其後又置講經博士儀鳳中置詳正學士神龍改昭文館宋建隆初復改爲昭文館初以昭文館隸于門下省後以昭文史館集賢謂之三館皆以宰相兼領大學士大元昭文館亦置大學士

考索周官師氏掌以媿詔王保氏掌諫王惡漢宣帝甘露三年詔諸儒講論五經於石渠閣光武數引公卿郎將講論經理章帝建初四年會諸儒于白虎觀講五經同異唐太宗置弘文館命孔穎達講五經正義宋太祖召王昭素對便殿令講易乾卦真宗幸國子監孫奭講尚書仁宗天聖元年上始御崇政殿召

翰林侍講孫奭馮元講論語詔雙日至是隻日亦詔侍講讀六年又命孫奭講尚書景祐元年以賈昌朝趙希言王宗道楊安國並為崇正殿說書日以二人入侍講院崇政說書自此始宋舊講讀官初未有制太宗始命呂文仲為侍講繼而加翰林學士侍讀真宗時乃特置翰林侍讀學士班次翰林學士舊講讀官每見先賜坐暫起講復坐仁宗富於春秋乃令儒臣並就御案遂故為事王安石以為道之所存禮亦加重請復賜坐不行程顥為侍講請坐不從元祐間蘇頌為侍講讀慶曆故事詔講讀官遇不講日各進漢故實二事宋之制有七曰殿學士曰閣學士曰雜學士曰待制曰殿撰曰修撰曰直殿閣殿學資望極峻無吏守無典掌惟出入侍從備顧問非宰相不除併以寵輔臣之去位者閣學士所以屬行義文學之士高以備顧問其次與議論典校讎得之為難選擇尤謹元祐二年詔增復館職及職事官並許帶職尚書二年加直學士中丞侍郎給合議議通及一年加待制

詹事府

類聚詹事秦官應邵曰詹省也給也秩二千石漢因之掌太子家位在長秋上竇嬰太后兄子景帝即位為詹事後漢省詹事太子宫屬悉屬少傅魏復置詹事領東宮眾務唐置詹事府詹事一人正三品少詹事一人正四品上龍朔改端尹少尹垂拱改宮尹宋東宮官有詹事仁宗升儲置詹事二人大元置太子詹事從三品少詹事正四品 左右庶子古者天子有庶子之官職庶子猶諸子周禮諸子之官司馬屬秦置中庶子員漢庶子為太子太傅屬官魏晉太子詹事有中庶子各四人局擬散騎侍郎品第五掌禁令糾正違闕侍從左右儼相威儀畫規獻納奏事文書皆典

綜之釋奠中庶子扶左庶子扶右 唐龍朔中置左右諭德各一人掌侍從贊諭職擬常侍掌諭皇太子以道德隨事諷贊宋東宮官有左右諭德建儲則置否則闕元置左右諭德掌諭道德侍從文章之文東宮之務歷代以中庶子典書坊置右庶子唐龍朔中改門下坊曰左春坊左庶子中允司議郎左諭德左贊善大夫崇文館學士校書郎洗馬文學校書正字等隸焉典書坊曰右春坊右庶子中舍人太子舍人右諭德右贊善大夫太子通事舍人家令率更令等隸焉 衛率秦官屬詹事後漢主門衛徽循衛士而屬少傅晉武帝建東宮置衛率凡太子出在前黃麾外左右二率從挾導輿車後衛率從在烏皮外並帶戟執刀其服並視左右衛將軍唐左右衛率率各一人副率各一人宋太子諸率府率從七品元置太子左

右衛率府率掌同衛導從儀仗事 僕秦官漢世太子五日一朝非入朝日遣僕及中允旦入請問起居後漢太子僕一人千石主車馬職如太僕晉詹事屬官有太子僕品第五主輿馬兼主親族如太僕宗正唐龍朔改僕寺為馭僕寺改僕為大夫元置太子僕正 唐置左右贊善大夫正五品上掌傳令諷過失贊禮儀以經教授諸郡王龍朔二年改太子中允為之宋元仍之 齊太子有內直梁有內主璽元置太子侍正 漢詹事屬官有食官令長丞晉食官令職如大官令隋改為典膳正 晉太子詹事屬官有洗馬八人掌皇太子圖籍經書職如謁者局準秘書品第七班同舍人下隋門下坊司經局置四人從五品下元有太子司經副司經 家令屬詹事漢太子食湯沐邑十

縣家令主之後漢太子少傅屬官有家令秩千石主食庫飲食

職比廷尉晉家令品第五隋煬帝改家令為司府令唐改為家

令寺龍朔二年改家令寺為宮府大夫元置太子家令掌司禮

儀法等漢太子少傅屬官有太子倉令隋典丞二人元置太

子司倉梁庶子屬官有錫賜庫局北齊家令寺領司藏署令

丞國朝置詹事府詹事正三品少詹正四品府丞正六品主簿從七品

錄事從九品左右春坊正五品左右庶子正五品左右諭德從五品左右

中允正六品司經局洗馬從五品左右贊善左右司直郎俱從六品左右

司紀郎從八品校書左右司諫正字通事舍人俱從九品官職焉

漢書孔霸宣帝時以經授太子為詹事寶嬰景帝初為詹事弟梁孝王帝酒酣曰千秋

萬歲後傳王嬰引酒進上曰父子相傳漢之約也

晉書武帝以王恭為丹陽尹領太子詹事恭讓表曰今日王儲始建四方是式總司之任崇替所由宜妙選賢材盡一時之勝

沈約碑儲端任顯東西兩晉茲選特難彈違是屬宜肅事於東朝

謝琰字瑗度安少子也左僕射領詹事大略詔令李寬冊弼諧

儲副必俟才英總務宮端允資忠蓋漢朝選德禮儀峻於寶卿

晉代任賢光榮歸於謝琰

卞壺為世子師前後居師保之任盡匡輔之節一府貴而憚焉

中興遷太子詹事世稱卞壺裁斷切直敷實忠於事上也王琰答徐

邈書詹事彈肅一官如尚書令中丞陸曄字士光少有雅望從兄機每稱之曰我家世不乏公矣太

興元年遷太子詹事以清貞著稱

南史宋殷景仁不為文而敏有思致不談義而深達理至於國典朝章舊章記注莫不撰錄識者知其有當世之志也宋少帝時與王華王曇首劉湛四人並為侍中以風力局幹冠冕一時遷尚書僕射太子詹事

齊孔稚圭表皇太子霞褰青殿日晃春宮駕紫谷之英振洛笙之響非自器上白雲韻同明月何以延芳芝苑插羽瓊條寶嬰戚貴於西京陸曄風素於東國伊人之美方曰可舉

陳書後主在東京欲以江總為詹事孔奐曰江總有潘陸之才而無園綺之實輔弼儲貳切謂非宜

唐書李綱為太子詹事太子嘗遊有進魚者太子使膾之唐儉趙元鼎自言其能太子曰操刀膾腥和鼎味公等善之若弼諧

審喻則屬綱矣

高宗為皇太子轉李勣為太子詹事太宗謂曰我兒新登儲貳卿舊長史今以宮事相委故有此授雖屈階資可勿怪也

張說女嫁盧氏嘗為舅盧公求官候父下朝而問焉父不語但指楮床龜而示之女歸告其夫曰舅得詹事矣

周必大辭詹事奏狀竊惟諸端華重今昔所同漢韋賢質樸篤學始膺委任唐李勣至於舊長史屈階資而為之近歲以來非老成端諒為世所推則必於近臣中擇嘗任王府講讀及官僚者就兼是職苟或異此寧虛厥官

環濟要畧庶子主宮中并諸吏之適子及支庶在版籍者也行其秩序作其徒役授八次八舍之職以徵俸

晉書武帝咸寧初詔曰男子皇甫謐沈靜履素守學好古與流俗異處其以謚為太子中庶子

晉王珉曰中庶子稱坊詹事稱寺

山公啓事庶子缺宜得俊茂者以濟陰太守留儼陽城太守石崇參選不審可有合聖意者不

陳書王瑒父冲嘗為瑒辭領中庶子世宗顧謂冲曰所以久留瑒於承華正欲使太子微有瑒風法耳

舊唐書薛元超永隆二年拜中書令兼太子左庶子高宗幸東都太子於京師監國因留元超以侍太子帝臨行謂元超曰朕之留卿如去一臂但吾子未閑庶務關西之事悉以委卿所寄既深不得默爾

六典左右諭德掌諭太子以道德也皇太子朝官臣則列侍於左右階出入則騎從於正道之左右其內外庶政有可為規諷者隨事而贊諭焉

唐書常承慶字延休弱冠舉進士辭藻之美擅于一時累遷太子司議郎太子賢監國不近聲色承慶上書諫曰殿下岳峙淵渟金貞玉裕百僚仰重曜之暉萬姓聞滂雷之響居處服玩必循節儉畋獵遊娛不為縱逞則可以克享終吉長保利貞又常為諭善箴以獻太子太子賜予甚厚

德宗拜崔芊為諭德芊對東宮曰臣不識朝廷典故見殿下合稱臣否東宮曰卿是東寮自合知也

言行錄宋朝仁宗在東宮魯質肅公宗道為諭德一日真宗召使者及門而公不在移時乃在肆中飲歸中使遽先入白乃與

公約曰上若怪公來遲當託何事公曰但以實告中使曰然則得罪公曰飲酒人之常情欺君臣子之大罪中使嗟嘆而去真宗果問使者具如公對自此奇公以為忠實可大用

通典隋有內允貞觀初曰中允掌侍從贊相駁正啓奏總司經皇太子出則版奏外辨中嚴入則解嚴龍朔元年改門下坊曰左春坊中允曰左贊善大夫唐以王珪孔穎達杜淹陸德明王維為中允

漢書汲黯字長孺孝景時為太子洗馬黯姊子司馬安亦少與黯為太子洗馬安文深巧善宦四至九卿職官出則在馬前清道故曰洗馬

襄陽者舊傳李密晉武徵為太子洗馬詔累下郡縣逼遣密上數疏武帝覽其表曰密不空有名嘉其誠款賜奴婢二人郡縣

供其祖母俸贍後劉終復以洗馬徵

晉書解系字少連次弟結字仲連次弟育字稚連各清身潔已仕皆為洗馬州里榮焉

南史裴松之字世期宋武帝北伐領司州刺史既剋洛陽松之居州行事宋國初建毛德祖使洛陽武帝敕之曰裴松之廊廟之才不宜久居邊務今召為太子洗馬與殷景仁同可令知之梁庾於陵字子介天監中為太子洗馬舊事東宮官屬通為清選洗馬掌文翰尤其清者近世用人皆取甲族有才望時於陵與周捨竝擢充職高祖曰官以人而清豈限以甲族時論以為美

舊唐書李綱字文紀開皇末為太子洗馬皇太子勇嘗以歲首

宴宮臣左庶子唐令則自請奏琵琶又歌武媚娘之曲綱白勇
 曰令則身任宮僚職當調護乃於宴坐自此倡優進淫聲穢視
 聽事若上聞令則罪大不測豈不累於殿下臣請舉正其罪
 通典唐司經局洗馬掌經籍出入侍從圖書上東宮者受藏之
 龍朔二年改洗馬為司經大夫三年改司經局為桂坊以洗馬
 為桂坊大夫糾正違失

六典左右贊善大夫龍朔二年初置左贊善大夫替中允右贊
 善大夫替中舍人咸寧元年中允復舊而贊善大夫別自為官
 皆掌侍從翊贊太子以規諷也皇太子出入動靜苟非其德義
 則必陳古以箴焉

舊唐書歸崇啟字正禮少勤學以經業擢第天寶末對策高第
 授左拾遺改秘書郎遷起居郎贊善大夫

宋書徐陵父橘為左衛率又袁淑為太子左衛率謝莊為太子
 中庶子時南平王獻赤鸚鵡普詔羣臣為賦淑文冠當時作賦
 畢示莊及見莊賦歎曰江東無我卿當獨秀我若無卿亦一時
 之傑遽隱其賦

唐李大亮拜左衛大將軍十七年晉王為皇太子東宮寮屬皆
 盛選室臣以大亮兼太子右衛率俄兼工部尚書身居三職宿
 衛兩宮甚為親信大亮每當直必通宵假寐太宗勞之曰當公
 宿直我便安卧

漢書張晏注曰太子稱家故曰令家令之職掌皇太子之膳倉
 儲庫藏之政令總食官典倉司藏三署之官屬凡皇太子備禮

出入則乘輅車具威儀先儲臣以導引若祭祀賓客則供酒食
以為獻主

晁錯上書言人主所以尊顯功名揚於萬世之後者以知術數
也皇太子材知高竒然於術數未有所守上於是拜錯為太子
家令以辨得幸太子太子家號曰知囊

齊書文惠入居東宮沈約為步兵校尉管書記時宮中多士約
特被親遇每旦入見影斜方出尋遷太子家令約嘗侍宴梁武
帝有妓婢師是齊文惠太子宫人帝問識座中客否曰唯沈家
令約伏地流涕

梁書徐擒屬文好為新變不拘舊體為皇太子家令兼管書記
文體既別春坊盡學宮體之號自斯而起

考索唐太宗為晉王府有侍講及為太子亦置焉其後或置或
否開元初十王宅引學士入教亦為侍讀至宋始置二官
天禧四年參政任中正樞副錢惟演參政王曾並兼太子賓客
執政兼東宮官自此始 國朝有太子賓客亦以部院辭臣兼
焉

漢書武帝戾太子初上為立博望苑使通賓客從其所好故賓
客多以異端進

宋書至道元年尚書左丞李至禮部侍郎李沆並兼太子賓客
見皇太子如師傅之禮上召謂至等曰朕以太子仁孝賢明今
立為儲貳當須正人輔之卿等可盡心調護若動皆用禮必須
贊成如事稍有未當不可隨順至於禮樂詩書之道可以裨益

太子者皆卿等素習不假朕多訓也

樞密院

類聚唐代宗永泰中置內樞密事始以宦者為之初不置司局但有屋三楹貯文書而已其職掌惟承受表奏於內中進呈若人主有所處分則宣付中書門下施行而已永泰中宦官董廷秀參掌樞密事長慶中王守澄知樞密事舊左右軍容多人為樞密亦無視事之廳後僖昭時楊復恭西門季玄欲奪宰相權乃於堂狀後帖黃指揮公事此其始也後梁革唐世宦官之弊開平元年改樞密為崇政院唐莊宗同光元年復以崇政院為樞密院周亦有之宋初魏仁溥以宰相兼樞密使建隆三年以樞密副使兵部侍郎趙普為檢校太保充樞密使不帶正官自

普始也又以宣徽北院使李處耘為南院使兼樞密副使開寶九年以曹彬為樞密使領忠武軍節度使樞使帶節度自此始也太平興國六年以樞密副使石熙載為戶部尚書充樞密使以文資正官充使自此始也大中祥符五年以知樞密院王欽若陳堯叟同中書門下平章事充樞密使儒臣為樞使兼使相自此始也元豐改官制議者欲廢樞密院歸兵部神宗曰祖宗不以兵柄歸有司故專命官統之互相維制不從元置樞密院掌凡武備機密之事有樞密使同知又有副使梁崇政院置副使一人自五代以來皆參用文武大中祥符以王嗣宗曹利宋太平興國八年張用並為檢校太保充樞密院副使天禧四年以華州齊賢王沔並以右諫議大夫充觀察使曹瑋宣徽北院使鎮國軍留後簽書樞密院事簽書兼蕃鎮自此始元豐官制行使副簽書悉罷同簽書院舊制無同簽書者治平其屬有判

官經歷都事

都事舊無其官宋樞密院有都承旨似其職也自太平興國以楊守一充都承旨是其始真宗後稍用

吏人熙寧吏用士人以尚書郎集賢校理曾孝寬為起居舍人充史館修撰兼都承旨崇寧以後則用專武臣矣

照磨

管勾等職在外又置行樞密院自副使以下諸職皆同

王世貞曰大都督府因樞密院而改建之者也樞密院之職實古太尉大司馬諸將軍而其名則循唐宦官之舊五季托肺腑其權據宰相上宋顓兵政稍與宰相次而號兩府然皆搢紳大夫為之至元而用其國人與漢人之以武功顯者第往往參互一二搢紳以贊其摹畫至明興而截然武弁藪矣高帝之下集慶置中書省即置行樞密院而自領之吳元年甲申正月即王位定大都督從一品左右都督正二品同知從二品副使正三品僉事從三品尋大都督文正坐罪廢罷不設以左右都督

為長官十月進階俱正一品同知從一品副使從二品僉事從三品二年革副使陞僉事正二品凡天下將士兵馬大數蔭授遷除與征討進止機宜皆屬之十三年分大都督為五軍都督府見若以為品秩如其故者而兵部陰移之其權漸分矣至永樂而盡歸之兵部所謂五都督者不過守空名與虛數而已其左右都督以下至同知皆以加邊將之有功者其僉事以待序遷者而掌印僉書之類必以屬公侯伯間有屬老将之實為都督者不能什一也其屬五斷事司下各設稽仁稽義稽禮稽智稽信今俱革而其職為經歷從五品都事正七品馬

通鑑唐僖宗乾符六年以李順融為樞密使降白麻於閣門出

案與將相同

後唐樞密使凡東西院二員宋朝亦東西院但行院印

五代史梁之崇政使乃唐樞密之職蓋出入之任也至梁始用士人其備顧問參謀議于中則有之未始專行事於外也至崇韜重誨為之始復唐樞密之名然權侷宰相矣後世因之遂分為二文事任宰相武事任樞密

翰林續志舊例樞密使未帶使相省不宣麻至周太祖初潛歷試是任乃宣制於公朝今之宣麻自周太祖始

家塾記神宗改官制大事三省共密院同議進呈畫旨稱三省樞密院同奉旨三省官皆同簽付樞密院行之小事獨取旨行訖關三省每朝三省樞密院先同對樞密退待於殿廬三省始留進呈三省事退樞密院再上進呈獨取旨遂為定制又常事密院自行至涉邊則三省聚議謂聞南廳唐大中故事對延英兩中尉先降樞密使候旨殿西宰相奏事畢案前受事郭崇韜

重誨為樞密使始分領政事不由中書直行下者謂之宣如

旨之救小事則發頭子擬堂帖也至今樞密院用宣及頭子

會要樞密使宋朝首命趙韓王普時號稱二府禮遇無間每朝

奏事與中書先後上所言兩不相知祖宗亦賴此以聞異同用

分宰相之權文彥博制導上帝之命象在北樞本天下之兵侷於台府王禹偁制宥密之府掌樞機於萬微王珪

制天極環樞上通帝位之紀神兵會府內嚴師律之謀

職官分紀國朝之制大宴樞密使副不坐侍立殿上既退就御

廚賜食與閣門引進四方館使列坐廡下親王一人伴食每春

秋賜衣門謝則與諸司使副班于庭中故朝中為之語曰廚中

賜食階下謝衣熙寧詔國家以西樞內輔翊贊本兵任為重美王禹偁集自贊襄於衮職宜總領於星樞

玫瑰集王文定公召拜樞密使公在右府憂邊思職動中機會

江西賴文政擢寇陳峒李接之變淮陰劫寇等公應酬羽書號令賞罰明審平當上亦稱其毫釐不差

范鎮除富弼樞密使制兵布于天下而至衆故統之有本元謀出於堂上而無窮故資之於明哲是以基于靜密式暢遠猷始乎幾微能成大務若時付畀茲謂劇艱

汪藻代汪副樞辭免表竊惟樞院之司實次鈞衡之任唯時初載順信獲助於天人宣帝遠圖安危注意於將相倘以小人而大受孰宣元老之壯猷

王禹偁上王樞密詩西樞經緯才慷慨遇真主文學中甲科風雲參霸府直躬在密勿未始憂強禦

職源簽書大抵以處資淺之人若簽書一經親祠方進同知及樞副若武臣擢預國政只除同簽書

四朝志都承旨副承旨掌承宣密命通領院務若便殿侍立閱試禁衛兵校則隨事敷奏承所得旨以授有司

神宗正史都承旨從五品副承旨正六品

楊廷秀樞密官屬記此記為都承旨作其間以事其事不事其事反覆為言則今日建都事之職亦此意也中書樞密院曰二府國朝之制也亦因也樞密之屬曰都承旨副承旨曰檢詳曰編修在祖宗時都承旨則曾孝寬韓縝檢詳則王存劉安世編修則顧臨錢長卿皆其選也中興損益至今日蓋六十年矣而壁記未立今都承旨李公昌圖乃克為之屬某記焉

御史臺

類聚御史之名周官有之戰國秦趙澠池之會各命書其事則皆記事之職至秦漢為糾察之任所居之署漢謂之御史臺亦

謂之蘭臺寺宋魯肇記御史臺與尚書謁者並謂三臺大夫更

而無告者得與中書門梁及後魏北齊謂之南臺後周曰司憲

隋及唐皆曰御史臺武后改為肅政臺置左右左以察朝廷右

以澄郡邑龍朔後但為御史臺至德後諸道使府參佐皆以御

史為之謂之外臺宋沿唐制設御史臺大夫無定員止為兼官

中丞除正員外或帶他官次有知襟御史一員副中丞天禧始

置言事御史唐太宗時有御史裏行之名景祐中始置以處御

史之官卑者唐儀臺案有六監司元豐三年李定請行六察於

是以御史專領六察請以吏部及審官東西院二班院隸吏察

審刑院隸刑察兵部武學隸兵察禮祠部其後以中丞為長知

太常寺隸禮察少府將作等隸工察從之襟御史為侍御史言事官為殿中侍御史六察為監察御史元

御史臺掌糾察朝儀彈劾官邪勘詢官府公事凡內外刑獄所

屬理斷有不當陳訴者付臺治之登檢院隸焉

王世貞曰都察院古御史府也自周官御史掌贊善授法令秦

人因之自漢益重置大夫以貳丞相銀印青綬位上卿於萬機

無所不參攝每丞相闕則大夫以次選代成哀之際遂為大司

空與丞相大司馬俱封侯位三公金印紫綬後雖旋復旋改而

建武以還遂定與太尉司徒仍三公故鼎足承君矣當御史大

夫時有中丞二在內則掌蘭臺秘書受公卿奏事舉劾按章外

則督部刺史與丞相司直司隸校尉察舉非法自大司空設而

中丞廢歷晉宋南北朝以至北齊後周別設中丞主臺事而御史府自是稱臺矣後魏以至北齊改中丞爲中尉最號雄峻若李彪崔暹之類糾按貴戚威行朝省瑯琊帝子之尊尚假赤捧之威以自張餘可推也隋始復置大夫罷中丞唐初亦因之有以其官爲大司憲者以臺爲肅政者而職任如故開元之際復爲御史臺而大夫與中丞不並設其職俱以振綱紀察奸弊中丞秩雖卑于大夫而雄峻過之至有徑入相者宋初有中丞而無大夫其屬有侍御史監察裏行知襍之類大約三司使學士承旨以爲班知諫院司諫正言以爲表裏叅知樞副丞郎僉院以階進監司牧守以待退至元而尤重其任設大夫從一品中丞正二品侍御史從二品治書侍御史正三品皆爲長官當是時札牙篤帝有恒言中書省樞密院吾左右手也御史臺治吾左右手病者也旨天明與其初制一循元舊當是時左右大夫湯和鄧愈數膺斧鉞寄外出而中丞劉基章濫理臺事後乃定設左右都御史正二品左右副都御史正三品左右僉都御史正四品職糾劾官邪申辨冤抑而所屬御史分爲十三道御史巡按以至它公委出則奏請還則考績然御史獨不係都察院以示得相糾察之意其以左右都御史而下總督提督叅贊巡撫各鎮者初自本院出曰公差事完或得代則回理院事其後不勝多則往往自部佐卿寺藩臬轉遷亦不復歸院

漢舊儀御史大夫秦官位上卿掌副丞相初學記御史大夫寺在司馬門內門無塾其門署用梓板不釁色題曰御史大夫寺

蔡質漢儀御史臺率執憲中司朝會獨坐內掌蘭臺督諸州刺

史糾察百察 六典注初漢御史中丞掌蘭臺秘書圖籍故 歷代置都邑建臺省以秘書與御史為鄰

通典漢御史大夫副丞相事若今之同平章及叅知機務之類 所以漢書曰薛貢常匡迭為宰相薛宣常賢匡衡則是丞相而 貢禹但為御史大夫

國史補御史故事大朝會則監察押班常參則殿中知班入閣 則侍御監奏含元殿昷遠用八品宣政殿其次用七品紫宸殿 最近用六品殿中得立五花塼綠衣用紫案縵之類號為七貴 唐臺儀臺印隨從印左巡印右巡印監倉印監庫印監察印出 使印謂之八印

楊楞伽鄴都故事御史臺在宮闕西南其門北開取冬殺之義

斯事久矣今東都臺門所以不北向者蓋欲變古之制或建造

者不習故事耳 舊制御史以鷲羽飾車以白鷲為 見泉中魚象御史察隱微之罪

會要宋朝在禁中唯三官得告宰相告于中書翰林學士告于 本院御史告于朝堂皆用朱衣吏謂之三告官

漢書趙堯傳周昌為御史大夫徙為趙相高祖持御史大夫印 弄之曰誰可以為御史大夫熟視趙堯曰無以易堯遂拜御史 大夫

倪寬為御史大夫初梁相褚大通五經為博士時寬為弟子及 御史大夫缺徵褚大以為御史大夫至洛陽聞寬為之褚大笑 及至與寬議封禪於上前大不能及退而服曰上誠知人

張湯為御史大夫鉏豪疆并兼之家舞文巧詆以輔法湯每朝

奏事語國家用日旰天子忘食丞相取充位

杜周刻深上以為盡力無私遷為御史大夫子延年字幼公五

鳳中徵為御史大夫居父官府不敢當舊位坐卧皆易其處

魏相字弱翁宣帝即位遷御史大夫故事諸上書皆為二封署

其一曰副領尚書者先發副封所言不善屏去不奏相復因許

伯白去副封以防壅蔽

貢禹字少翁元帝時陳萬年卒禹代為御史大夫列於三公自

禹在位數言得失書數十上又言孝文皇帝時貴廉潔賤貪汙

今天下奢侈官亂民貧盜賊竝起姦執不勝則取勇猛能操切

百姓者以寄暴威服下者使居大位故亡義而有財者顯於世

欺謾而善書者尊於朝諄逆而勇猛者貴於官

薛宣明習文法詔補為御史中丞執法殿中外總部刺史數言

政事舉奏部刺史郡國二千石所貶退稱白黑分明由是知名

舊唐書帝思謙在憲司每見王公未嘗行拜禮或勸之荅曰鵬

鷲鷹鸛豈眾禽之偶柰何設拜以狎之且耳目之官固當獨立

也則天光宅元年分置左右肅政臺復以思謙為右肅政大夫

大夫舊與御史抗禮思謙獨坐受其拜或以為言思謙曰國家

班列自有著等柰何以姑息為事耶

開元中崔隱甫為御史大夫帝謂曰卿為御史海內咸云稱職

甚副朕之所委又憲司故事大夫以下監察御史覲為官政畧

無承稟隱甫一切督責事無大小悉令諮決稍有忤意者便列

上其罪前後貶黜殆半群僚側目

李景讓為御史大夫內臣貴戚泥樓有看街樓閣皆泥之

田其
彈劾

會要御史大夫李承嘉嘗召諸御史責之曰近日御史彈事不
容大夫禮乎衆不敢對監察御史蕭至忠進曰故事臺中無長
官御史人君耳目比有事主得自彈事不相關白若先白大夫
而許則彈大夫不知白誰也

唐書睿宗制曰國之副相位亞中台自匪邦直孰司天憲將作
大匠尹思貞剛不護缺清而畏知簡言易從莊色難犯徵先王
之體要敷衽必陳折佞臣之怙權拂衣而謝故以事聞海內名
動京師鷹隼是擊豺狼自遠必能條理前弊發揮舊章宜承弄
印之榮式允登車之志

李叔明字晉族兄仲通字向叔明與仲通俱尹京兆及兼秩御
史中丞茲節制劍南又與子昇俱兼大夫蜀人推為盛門肅宗
時李

峴與兄暉俱以京
兆兼御史大夫

唐臺儀大夫中丞午後三刻出迴避丞相如午前出宰相回避
大夫中丞分紀江左拜中丞不得復入尚書省中丞鹵簿至百
官避路北史後魏御史中丞其出入千步清道與皇

上太子分道
王公遜避

中宗制避車要秩非德靡升專席雄班惟賢是屬侍中楊再思
投水陳謨邁漢朝之三傑霑砂作相掩虞日之五臣佇因獻替
兼肅權豪宜分務於鸞扃俾効能於烏署

烏臺峻秩朱博傳漢御史府并舍百餘區府中列
栢樹常有野烏数千棲止朝去夕來望總鐵冠蒼

佩崇班威高石室爾蘇珣詞吞楚澤量湛黃陂西京展驥道掩
題輿右輔憑熊風超露冕朱帷霧撒初停州縣之勞白簡霜飛

晉傳玄天性峻急每有奏劾或直日暮捧白簡整襟坐以待旦於是貴遊懾伏臺閣生風道詩盛府持清索殊章動繡衣風連臺閣起霜就簡花飛宜屏權豪之氣蘇味

備要治平中執政恃權以沮言者凡臺諫官言入輒以進呈訖寢之時謂之訖了也

漢官御史大夫本有兩丞其一曰御史丞二曰御史中丞謂之中者以其別在殿中掌蘭臺秘書外督捕刺史內領侍御史受公卿章奏糾察百寮休有光烈

漢官解詁建武以來省御史大夫官屬入侍蘭臺蘭臺有十五人特置中丞一人以總之此官得舉非法其權次尚書

魏志鮑勛字叔業黃初四年尚書令陳群僕射司馬懿並舉勛為宮正宮正即御史中丞也帝不得已而用之百寮嚴憚罔不

肅然

傳咸中丞箴煌煌天文宿星是環爰立執法光輝有煥執朝之綱秉國之憲鷹虎視揚肅清違慢

通典宋中丞銅印黑綬進賢兩梁冠佩水蒼玉介幘絳朝服南史梁中丞給威儀十人其人武冠絳繡執清儀囊在前唐書舒元褒上疏曰元和長慶中中丞所止不過半坊今乃至兩坊謂之籠街喝道但以崇高自大

宋書王淮之字元魯高祖彬尚書僕射曾祖彪之尚書令祖臨之父納之並御史中丞彪之博聞多識練悉朝儀自是家世相傳並諳江左舊事緘之青箱世人謂之王氏青箱學

南史王僧虔為御史中丞領驍騎將軍甲族由來多不居憲臺王氏分枝居烏衣者位宦微減僧虔為此官乃曰此是烏衣諸

郎坐處我亦可試為耳

江淹字文通為中丞明帝曰今君為南司足以肅震百僚也淹乃彈中書令謝朓等內外肅然帝曰自宋以來無嚴明中丞君今日可謂近世獨步

任昉為中丞簪裾輻輳頤其讌者殷芸劉溉劉孺顯劉孝綽陸倕而已號曰龍門之遊

沈冲字景綽與兄淡深並歷御史中丞兄弟三人皆為司直晉宋所未有也

北史宋游道神武啓以為中尉文襄執請乃以吏部郎史崔暹為御史中尉以游道為尚書左丞文襄謂暹遊道曰卿一人處南臺一人處北省當使天下肅然 崔暹字李倫為御史中

尉文襄與諸公出之東山遇暹在道前驅為赤棒所擊文襄與

馬暹之魏帝宴華林園謂神武曰自頃所在百司多有貪暴朝

廷中有用心公平直言彈劾不避親戚者王可勸酒神武降階

跪言唯御史中尉崔暹一人謹奉明旨敢以酒勸

唐書盧奕懷慎之少子也與兄奐齊名天寶十一年為御史中

丞始懷慎及奐並為此官父子三人為中丞清節不易時人美

之三朝要畧梁張紹字孝卿為中丞兄績為僕射元日朝會及百司就列兄弟並道騶兩塗時人榮之

文宗曰牛僧儒可為大夫鄭覃曰頃為中丞未嘗搏擊恐無風

望上曰鸞鳳與鷹隼事異

仁宗實錄張昇為中丞仁宗以昇指切時事無所避曰卿孤特乃能如是昇曰臣朴學愚忠仰託睿聖是為不孤今陛下之臣

特祿養交者多而赤心報國者少似陛下孤立也

東軒筆錄孫參朴為中丞薦唐介吳中復為御史人或問曰君

未嘗與二人相識而遽薦之何也答曰昔人耻呈身御史今豈

求識面臺官也後二人皆以風力稱於天下御史臺有閣吏隸

之時以所執之挺待中丞賢否賢則橫其挺不賢則直其挺凡

為中丞惟恐其直時范諷為中丞一日視其挺直范問曰爾挺

忽直豈我之失耶吏曰昨日中丞召客諭庖人造食指揮者數

回去又教戒之數四大凡役人者授以法觀其成何俟喋喋若

使宰天下如此不亦勞乎某心却之不知

杖之直也范大笑慚明日視之挺復橫矣

九朝通畧豐稷為中丞宦官浸盛稷懷唐書上殿為上讀仇士

良傳數行上曰已諭稷偽不聞讀畢

言行錄張詠為御史中丞時真宗令進所著述且稱文善取常

執絹金龍扇以賜之曰美今日獻文事程文簡公琳權御史中丞宰相張知白曰不辱

矣

尚書故實臺儀自大夫以下至監察通謂之五院御史國朝歷

踐五院者共三人焉李商隱張延賞温造也

通典御史中丞舊持書御史中丞也初漢宣帝元鳳中感路温

舒尚德緩刑之言秋季後請讞時帝幸宣室齋居而決事令侍

史二人持書持書御史起于此也魏職令品乘輿臨堂及諸處

於階側以

備顧問

梁書謝幾卿自尚書三公郎為治書侍御史舊郎官轉為此職

者謂之南奔幾卿頗失志多陳疾臺事畧不復理

何思澄自廷尉遷治書侍御史宋齊已來此職甚輕天監初始

重其選車前依尚書二丞給三駟執盛印青囊

隋書柳或為持書侍御史當朝正色為百寮敬憚上嘉其直謂或曰大丈夫當立名於世無容容而已

六典周御史掌萬民之治令以贊冢宰凡治者受法令焉以其在殿柱之間亦謂之柱下史秦改為侍御史張蒼自秦時為御史主柱下方書即其任也漢因秦制置侍御史十五員受公卿奏事舉劾按章隋唐又置內供奉掌糾舉百僚侍御史號臺端他人稱曰端公而知雜事者謂之南床殿中監察不得坐凡侍御史之例不出累月遷登南省故號為南林曲阜制處以橫榻使參中司後漢輿服志獬豸冠按禮圖曰法冠也一曰柱後惠文如淳注獬豸冠秦制也法官服之按董巴注云獬豸神羊也蔡邕曰如淳應邵云此獸主觸不直故執法者服之楚王獲神羊以為冠

秦威楚以其君冠賜執法近臣御史服之

大駕駕車八十一乘尚書御史皆載最

後一車懸豹尾薛綜注曰侍御史載之

漢表武帝時侍御史又有繡衣直指者出討姦猾理大獄而不常置注直指而行無阿私也衣以繡者尊寵之也

武帝末郡國盜賊群起暴勝之為直指使者衣繡持斧逐捕盜督課郡國誅不從命威振州郡

嚴延年字次卿少學法律舉侍御史是時大將軍霍光廢昌邑王尊立宣帝宣帝初即位延年劾奏光擅廢立亡人臣禮不道奏雖寢然朝廷肅焉敬憚

張綱字文紀漢安元年選遣八使徇行風俗皆耆儒知名多歷顯位唯綱年少官次最微餘人受命之部而綱獨埋其車輪於

洛陽都亭曰豺狼當路安問狐狸遂劾大將軍莫不法事

桓典字公雅拜侍御史是時宦官秉權典執政無所回避常乘

驄馬京師畏憚為之語曰行行且止避驄馬御史

後漢書陳翔字子麟少知名拜侍御時正旦朝賀大將軍梁冀

威儀不整翔奏異恃貴不敬請收案罪時人奇之

魏畧當大會殿中侍御簪白筆側陞而坐帝問左右此何官何

主辛毗曰此謂御史舊時簪筆以奏不法當如今者直備位但

眊筆耳

王弘義為侍御史恨其傍舍求瓜不遂狀言園有白兔縣命捕逐瓜乘盡語曰昔聞蒼鷹獄吏今見白兔御史

晉書劉暉字長升毅子也正直有父風為侍御史武庫火尚書

郭彰率百人自衛而不救火暉正色詰之彰怒曰我能截君角

也暉勃然謂彰曰君何敢恃寵作威作福天子法冠而欲截角

乎求紙筆奏之彰伏不敢言

唐書李素立高祖令授七品清要官所司擬雍司戶上曰此官

要而不清擬秘書郎上曰此官清而不要遂授侍御史

乾封二年韋仁約除御史約曰御史御命出使不能動搖山岳

震懾州縣誠曠職耳

王志愔為左臺侍御史執法剛正百僚畏懼時人號為阜鵬言其顧瞻人吏如鵬鷄

之視燕雀也

賈言忠為侍御史時有事遼東言忠奉使往支軍糧及還高宗

問以軍事言忠盡具山川地勢且陳遼東可平之狀高宗大悅

忠嘗撰監察本草云服之心憂多驚悸生白髮時議云裏行及

試員外者為合口椒最有毒監察為開口椒毒微歇殿中為蘿

蔔亦曰生薑雖辛辣而不為患侍御史為脆梨漸入佳味遷員

外郎為其子可久服

敬宗朝夏州節度使李祐入朝違詔進奉侍御温造彈之祐趨出待罪股戰流汗謂人曰吾夜踰蔡州城擒吳元濟未嘗心動今日膽落温御史矣

通典舊御史遭長官於途皆免帽降乘長官職轡辭而止馬乾封中王本立為侍御史意氣頗高途逢長官端揖而已自是諸人或降而立或一足至地或側鞍弛輻輕重無常開元以來但舉鞭聳揖而已侍御史凡上堂絕言笑不可忍者雜端大笑則闔座皆笑謂之烘堂烘堂不罰言行錄劉忠肅公摯擢侍御史公自熙寧以言去位踰十六年乃復任言責好佞刻薄之吏書狀顯著公皆正色彈劾多所貶黜中外肅然時人以比包希仁呂獻可上察其忠義誠信可屬重任未幾大用焉

質肅公唐介為御史張堯佐再除宣徽使介爭之仁宗諭曰除

擬初出中書介遂極言宰相文彥博知益州日進燈籠錦媚貴妃致位宰相請逐彥博仁宗怒貶介英州別駕晁以道云仁宗貶唐介嶺南遣中使賜介金又畫其象置之便殿梁張緬為中丞號為勁直

梁武帝遣圖其形於臺首以勵當官

皇祐中侍御史宋禧上言乞宮中養羅江狗以備不虞上曰養兵百萬威制夷狄尚虞不可備不虞卿令宮養狗無謂也曹穎叔言朝言不及犬馬而禧被黜於是有宋羅江之號則天將不利於王室

羅織之徒匹與矣時授侯思立為游擊將軍高元禮呼之為侯大曰國家用人不次若言侯大不識字即奏云獬豸獸亦不識字而能觸邪則天果如其問思立以獬豸對則天授三年乃拜左臺侍御史

魏蘭臺遣御史二人居殿中伺察姦非側陞而坐故曰殿中侍御史隋改殿內侍御史唐武德置殿中侍御史四員正官增二人掌殿廷供奉之儀京畿諸州兵皆隸焉彈舉違失號為副端正班列於閤門之外有離立失列言囂而不肅則紀法之其正冬大會則戴黑豸乘馬加飾文明元年又置殿中裏行宋殿中侍御史二人正七品掌言事分糾凡朝會及朔望六參官班序元豐八年詔殿中侍御史兼察事監察御史兼言事元置殿中侍御史二人每遇侍朝立於龍墀之下專掌朝見之儀

唐書張行成少師事劉炫炫曰張子體局方正廊廟材也補殿中侍御史糾劾不避威權太宗謂房玄齡曰觀古今用人必因媒介若行成者朕自舉之無先容也

上官儀位宰相時以雍州司士常絢為殿中侍御史或疑非遷儀曰此野人語耳御史供奉赤墀下接武夔龍遙羽鷓鴣豈雍州判佐比乎

職林正無執轉殿中侍御史舊例每日更直於殿有三班時宰相宗楚客楊再思常離班偶語無執前曰朝禮至敬公等大臣輕易以慢常典

郭弘霸為左臺殿中侍御史則天召見弘霸自飲其血絕其髓則天悅故拜為左臺侍御史

言行錄趙清獻公抃召為殿中侍御史彈劾不避權倖京師號為鐵面御史

龐參敏公籍入為殿中侍御史中丞孔道輔謂人曰今之御史多承望要人風旨陰為之用獨龐公天子御史耳

實錄治平二年以范純仁爲殿中侍御史呂太防爲監察御史
裏行近制御史有闕則命翰林學士御史中丞迭舉二人而上
自擇取一人爲之至是闕兩員舉者未上內出純仁太防姓名
而命之

係年錄紹興三十一年杜莘老爲殿中侍御史入見上曰知卿
不畏強禦故有此授爲御史極言無隱取衆所指如王繼先張
去偽董悉擊去之及罷去朝士祖道都門以詩文稱述者百餘
人都人至今以爲美談雖宿衛武夫府寺賤隸誦說前朝骨鯁
敢言之臣必柱殿院云

洪咨夔辭殿中侍御史狀竊惟柱後惠文之官尤重殿中執法
之選職脩明於國是用整肅於朝綱粵從琴瑟之更張類多矛
盾之竝立邊帥之或和或戰正值兩強廷臣之孰是孰非必求

一勝決治亂安危之勢觀抑揚進退之機疇副臺端蓋論時望

考索秦有監察御史掌監部漢惠帝六年相國奏遣御史監三

部監者二歲更常以十一月奏事十二月還監其後州置監御

史宣帝遣御史察稽簿不實者監察之名兼取於此東晉武帝

太元中置檢校御史知行馬外事沈約宋書古司諫校尉知行

專掌行馬外事晉書曰隋改檢校御史唐貞觀又置監察御史

初以吳混之爲此官裏行始以馬周爲之宋御史多出外任風憲之職以他官領熙

寧三年除秀州軍事推官李定權監察御史裏行用選人爲御

史自定始乾道二年詔自今非曾經兩任縣令不得除監察御

史著爲條令元御史臺置監察御史又置曲事

唐百官志監察御史有六其一察官人善惡其二察戶口流散
帳籍隱沒賦役不均其三察農桑不勤食廩耗減其四察妖滑
賊盜不事生業為私蠹害其五察德行孝悌茂材異等藏器晦
迹應時用者其六察黠吏豪宗兼并縱暴負弱冤苦不能自申
者

李嶠論陛下置右臺分巡天下察吏人善惡觀風俗得失斯政
途之綱紀禮法之準繩也然諸道巡察使所條科目凡有四十
四件至於別準格勅令察訪者又有三十餘條而巡察使率是
三月已後出都十一月終奏事時限迫促臣望量其功程
大明會典凡監察御史按察司官巡歷去處所問公事有擬斷
不當者都察院按察總司隨即改正當該吏典罪之如律仍將

原問御史及分司官擬斷不當事理具奏得旨方許收問
凡監察御史按察司官巡歷去處所聞有司等官守法奉公廉
能昭著隨即舉聞若奸貪廢事蠹政害民者即便拿問其應請
旨者具實奏聞若知善不舉見惡不擊杖一百發煙瘴地面安
置有贓從重論

凡國家政令得失軍民利病一切興利除害等事並聽監察御
史按察司官各陳所見直言無隱

李勉拜監察御史屬朝廷右武勳臣恃寵多不知禮大將管崇
嗣於行在朝堂背闕而坐勉劾之肅宗歎曰吾有李勉始知朝
廷尊矣

帝表徵擢進士授監察御史不樂曰爵祿譬滋味也人皆欲之

吾年五十拭鏡擲白晷遊少年間取一班一級不見其味也將為松菊主人不愧陶淵明云

因話錄察院諸廳各有他名會昌初監察御史鄭路所署禮察

廳謂之松廳南有古松也呂太一拜監察御史裏行自負才華而不節真乃詠院中叢竹以寄意焉

曰擢擢堂軒竹青青剛歲寒心貞徒見賞籜小未成竿

楊假楊收並遺直之子假自浙西觀察判官入為監察御史收

亦自西川入為監察御史兄弟茲居憲府特為新例

言行錄明道先生顯權監察御史裏行前後進說甚多要以正

心室欲求賢育材為先嘗言人主當防未萌之欲神宗俯身拱

手曰當為卿戒之問所以為御史對曰使臣拾遺補缺裨贊朝

廷則可使臣撻拾臣下短長以沽直名則不能神宗歎賞以為

得御史體

洪咨夔辭鑒察竊以公議國家之命脉人材朝廷之精氣方其

未出則望之如景星如鳳凰及其既用則倚之為屈軼為解易

元祐王巖叟之召明道范仲淹之來繁時所推皆此其選周必大表

分直樓鳳之南察事行馬之外

通政司

筆談銀臺司兼門下封駁乃給事中之職當隸門下省故事乃

隸樞密院下寺監皆行劄子寺監具申狀雖二司亦言上銀臺

主判不以官品初冬獨賜翠毛錦袍

類聚虞書帝曰龍朕疾讒說殄行震驚朕師汝作納言夙夜出

納朕命惟允唐置門下省有侍中侍郎左散騎右諫議給事左

補闕拾遺等官宋太宗從魏羽請置封駁司又自通進銀臺司
 以待從官知元豐官制行有門下後省 國朝建文時通政司
 為寺使為卿通政叅政為少卿增其屬左右補闕拾遺各二員
 後改通政司使正三品 左右通政正四品 左右叅議正五品 經歷知事
 分理庶務焉

宋舊制止出納文書至嘉祐中何郊以待制領此職詔令有不
 便者輒封去之仁宗嘉其振職皆從之自此始為故事

故事中書進熟進草惟執政書押官制行筆談要事對稟謂之
 熟狀常事擬進謂之
 草給事獨書畫黃而不書草為令

原始 太祖命曾秉正為通政使諭之曰壅蔽於言者禍亂之
 萌專恣于事者權姦之漸故重喉舌之司以通上下之情以達

天下之政昔者虞之納言周之內史漢之尚書唐之門下省皆
 其職也官以通政為各政猶水心欲其常通無壅遏之患其審
 命令以正百司達幽隱以通庶務當職奏者勿避忌當駁正者
 勿阿隨當敷陳者毋隱蔽當引見者毋留難毋巧言以取容毋
 苛察以邀功毋讒間以欺罔公清亮直以處厥心庶不負委任
 之意太宗淳化四年以向敏中張詠同知銀臺通政司
 司舊隸樞密院至是始以敏中詠同知司事諫門下
 會典洪武間令本司職專出納與內外諸司俱無文移有徑行
 本司者以違制論後又定凡有 帝命必當詳審覆奏允當然
 後施行

洪武間定凡有四方陳情建言伸訴冤枉民間疾苦善惡等事
 知必隨即奏聞及告不公不法等事重者於底簿內謄寫所

告緣由齎狀奏聞仍將所奏 旨意於上批寫送該科給事中
轉令該衙門抄行常事者另置底簿將文狀編號用使關防明
立前件連人狀送當該衙門整理月終奏謝底簿送該科督併
承行該衙門回銷

凡每日早朝引奏天下臣民及入遞所奏事或五事七事遇大
寒大暑減免奏疏不一

凡六科中書舍人行移各衙門俱經本司轉行

諫院

類聚秦置諫臣郎中令屬官有諫大夫無常員多至數十漢武
帝元狩五年初置諫大夫秩八百石後漢諫議大夫六百石後
齊集書省有諫議大夫七人隋門下省有諫議大夫七人唐龍

朔改正諫大夫貞元四年分為左右左隸門下右隸中書宋承
五代之弊纔以定俸入而不親職明道元年陳執中為諫官屢
請置院於是以門下省為諫院徙舊省於左掖之西置諫院自
此始建炎三年詔諫議大夫不隸兩省別置局於後省之側許
與兩省官相見議事以登聞檢鼓專隸焉 補闕古無其官取

詩衮職有闕仲山甫補之義魏文帝勅群臣曰公卿等宜拾朕
之闕唐武后垂拱因其義創立四員宋雍熙五年改左右補闕
為左右司諫正七品

左傳楚有箴尹之職
即今補闕拾遺官

拾遺古無其官漢

汲黯願為中郎署出入禁闥補闕拾遺續漢書張衡為侍中拾
遺左右唐武后垂拱中因其義創立各二員宋雍熙改左右拾
遺為左右正言從七品元置諫議大夫及司諫補闕拾遺皆以

左右分員 國朝初置諫議大夫左右司諫左右正言今改六科都給事中正七品左右給事中給事中俱從七品不它隸以專彈劾馬

穀梁傳士造辟而言詭辭而出范甯曰辟君也詭辭而出不以實告人也風俗通曰禮諫有五諷為上故入則造膝出則詭辭故傳季友為劉穆之求贈表忠規密謨潛慮帷幄造膝詭辭莫見其際

漢書元帝寢疾史丹直入卧内頓首伏青蒲流涕言漢官儀凡章表皆啓

封其言密事則用卓囊也

唐書張玄素諫太宗修洛陽宮魏徵歎曰張公論事有回天之刀可謂仁人之言其利溥矣唐高宗自韓瑗褚遂良之死内外以言為諱高宗造奉天宮李善感

始上書極言之時人謂之鳳鳴朝陽

大曆十二年詔曰諫官所獻封事不限早晚任進狀來所由門司不得輒有停滯如須側門論事亦隨狀面奏即便令引對憲宗謂李絳曰比諫官多朋黨論奏不實皆陷謗訕欲黜其尤者若何絳曰人臣進言豈易哉如欲陳十事俄而去五六及時以聞而削其半故上達者纔一二今乃欲譴訶之使直言箝口非社稷利也

東都事畧劉元成安世字器之遍歷言路正色立朝知無不言言無不盡每以辨是非邪正為先進君子退小人為急其面折廷爭雷霆之怒赫然則執簡却立伺天威少霽復前極論一時奏對且前且却者或至四五殿廷觀者皆汗縮竦聽退則咨嗟

歎服至以俚語目之曰殿上虎
田錫字表聖嘗曰吾立朝以來封章五十二奏皆諫臣職任之
常事也豈可藏副示後謗時賣直悉取焚之真宗見之色必莊
嚴常謂曰此朕之汲黯也

言行錄陳忠肅公瓘字瑩中公在言路知無不言然議論持平
務存大體彈擊不苛細故未嘗及人私過

司馬光諫院題名古者諫無官自公卿大夫至於工商無不得
諫者漢興以來始置官夫以天下之政四海之衆得失利病萃
于一官使之言之其為任亦重矣居是官者當志其大捨其細先
其急後其緩專利國家而不為身謀彼汲汲於名者猶汲汲於
利也其間相去何遠哉

漢書李尤字伯仁侍中賈逵薦尤有楊雄之才明帝召作東辟
雍德陽諸觀銘拜諫議大夫

魏書張普惠為諫議大夫任城王澄謂普惠曰不喜君得諫議
惟喜諫議得君

唐書蘇世長拜諫議大夫侍宴披香殿世長曰是殿雕麗非煬
帝作耶高祖曰卿豈不知是朕作耶對曰瓊宮瑤臺非創業所
為耳

李景伯景龍中為諫議大夫中宗宴侍臣酒酣各命為回波詞
或以諂言媚上或要巧膠寵至李景伯獨為箴規語以諷帝不
悅中書令蕭至忠曰真諫官也

白居易與元稹書僕為諫官月請諫紙詩曰月慚諫紙二百張

李氏談錄先公嘗言故左省崔坡領事于宗諤因問坡義答曰唐諫議大夫雖在給舍之上待諫議歲滿方遷給事自給事遷舍人時有自郎署拜諫議者驟立在給舍上朝中謂曰饒君斗上坡亦須斗下坡來蓋言其却為給舍序班在下也後遂為故事

諫議班在知制誥上若帶待制則在知制誥下從職也戲語曰帶隆

言行錄蕭正肅公燧字照鄰遷右諫議入謝孝宗曰卿論議鯁切不求名譽糾正奸邪不恤仇怨故制詞謂善不近名仁必有勇道上意也

六典左右補闕掌供奉諷諫扈從乘輿凡發令舉事有不便於時不合於道大則廷議小則上封若賢良之遺滯於下忠孝之不聞於上則條其事狀而薦言之 左右拾遺垂拱中所置言

國家有遺事拾而進之

唐書裴均在中書有獨孤郁李正辭嚴休復自拾遺轉補闕及參謝之際均廷語之曰獨孤與李二拾遺孜孜獻納今之遷轉可謂酬勞無愧矣嚴補闕官業或異於斯昨者進擬不無疑緩休復悚慙而退

文宗以魏暮為補闕上嘗言於宰臣曰太宗皇帝得魏徵採拾闕失弼成聖政今我得魏暮於疑似之間必極匡諫雖不敢希及貞觀之政庶幾處於無過之地

鄭餘慶子澣為右補闕獻疏切直餘慶入朝憲宗謂曰卿之令子朕之直臣可更相賀

言行錄韓忠獻公為左司諫王沂公見公論事直切有本末嘉

謂公曰此年臺諫官多畏避為自安計否則激發近名如君固
不負所職諫官宜如此 忠獻琦公為諫官三年所存諫藁欲
斂而焚之以効古人謹密之義然恐無以見人主從諫之美乃
集七十餘章曰諫垣存藁自序於其首大畧曰諫主於理勝而
以至誠將之

仁宗正史明道中執政除其親舊二人為直言司諫上謂曰祖
宗法制臺諫官須出自宸選若大臣自除則大臣過失無敢言
者執政惶恐

崇政殿說書呂希哲除為右司諫蘇軾戲謂曰法筵龍象當觀
第一義希哲笑而不言傳燈錄達磨傳波羅提法中龍象按智
度論云龍象言其力大水行中龍力大陸行中象力大故負荷

大法者比之龍象

宋播芳賀洪郎中拜察院啓儀粉省以歸班
封阜囊而論事回天有力方將批徑尺之鱗

偃月生疑已不容立仗之馬曾謂考功一出息之頃遂見拾遺
九鑽火之明星既折於中台席遂前於半夜雨登表著徑拜裏
行鱗鬣觸邪難置很針而不回鷹隼始擊
左朝龍象之共觀聳聞破頰已足落膽

唐書柳察遷左拾遺公卿朝野託為成奏時譽以其博與目為

柳篋

李藩給事中制勅有不可遂於黃紙後批之吏曰宜別連
白紙藩曰別以白紙是文狀豈批勅耶裴垣稱有宰相器

宋書曰錫為左拾遺言軍國要機者一以議平漢之功駕馭戎
臣朝廷大體者四其乙乞脩德以來遠宜罷交州之司其二諫
官不聞廷諍給事中不聞封駁願擇材任人各司其局其三願
別修寺省用列職官其四言獄官以鐵為枷於法所無太宗覽
疏優詔褒答賜錢五十萬曰天植其性豈一賞可奪上作開元
寺塔錫上

疏衆謂金碧焚煌
臣以為金膏藥血

魯宗道為右正言事有違悞風聞彈疏真宗厭之一日願罷去
上悅其忠慰勉以遣他日追念其言御筆題曰魯直

漢儀注諸給事中日上朝謁平尚書奏事分為左右以有事殿

中故曰給事中多名儒國親為之掌左右顧問黃門郎屬黃

門每日暮入對青瑣門拜名曰夕郎通典齊世呼侍中為門下給事黃門為小門下

百官志掌侍左右分判省事弘文館繕寫校讎之課凡百司奏

抄侍中既審則駁正違失詔勅不便者塗竄而奏還謂之塗歸

季終奏駁正之目

六典給事中龍朔二年改為東臺舍人劉伯芻除給事制曰給

事東闈實掌駁議崔瑊除給事制曰左省駁議不畏強禦

舊唐書李遜為給事中嘗論時政以為事君之義有犯無隱陳

誠啓沃不必擇辰今君臣敷奏乃候隻日是畢歲臣下睹天顏

獻可否能幾何憲宗嘉之陳紀父寔寔子群文帝使給事曰何如祖父曰臣父有言而治臣有言而

治不

會典凡每日早朝六科輪官一員於殿廷左右執筆紀錄

聖旨仍於文簿內註寫某日某官某欽記相同以防壅蔽凡

各衙門題奏本狀奉旨發落事件開坐具本戶禮兵工刑五

科俱送吏科每日早朝六科掌科官同於

御前進呈凡內外一應章奏該部院題覆行各撫按官俱立

限奏報仍具考成簿二扇每日赴科倒換并開已未完手本註

銷每上下半年各科將過限未完事件并撫按職名先行該部

查明類送應題科分查覆欠數多寡具本題參凡登聞鼓

樓每日各科輪官一員如有申訴冤枉并陳告機密事情者受狀具題本封進其訴狀人先自殘傷者叅奏如決囚之日有訴冤者受狀後批校尉手傳令停決候 旨嘉靖年議准重囚家屬於臨決前一日即訴鼓薄暮封進

蔡襄賀梁給事中啓綴直西垣通籍北省專銀臺封駁之職進瑣闥追趨之班云湊風雲之嘉會躡霄漢之清蹕駕騰夕拜之遷傾倒辰猷之告封詞頭而不下舊傳解事舍人之名批敕尾以復歸共親儒者給事之效惟出令毋嫌反汗則議論咸歎回天

登聞鼓院

類聚唐天寶九載匭使為獻納使後又改知匭使宋雍熙元年

改匭為檢景德四年改為登聞鼓院命樞密直學士張詠判隸諫議大夫掌受文武官及士民章奏表疏凡言朝政得失公私利害軍期機密陳乞恩賞理雪冤濫又奇方異術皆受以通達凡進狀者先鼓院若為所抑則詣檢院中興之初因舊制置局于闕門之前南渡以來創治所於和寧門之下紹興戊寅復丞平之制移置居雙闕之左元置登聞鼓院又置同知一員

唐書武后匭四區東曰延恩賦有以養人觀農之事及南曰招諫有言時政得失及西曰伸冤賦頌求官爵者投之北曰通玄有言玄象非直言正諫者投之秘者以正諫大夫補闕拾遺一人充使知匭事

隆平集咸平改登聞院曰登聞鼓院曰登聞鼓院自是匭函遂廢天聖間復於檢院鼓院各以匭函為檢匣凡言大事朝

政闕失或訴冤未辨者悉命檢匣以進即言涉奇邪無得通聞
置檢理使領之

真宗實錄田錫字表聖入判登聞檢院因壽寧節獻詩二十韻
太宗和賜又上東封書翌日命知制誥

考索宋文帝元嘉元年魏主詔闕左懸登聞鼓以達寃人南梁
武帝天監六年詔於公府謗木肺石傍各置一函百姓已窮九

重莫達若欲自申投肺石函唐大曆中詔天下寃滯於朝堂受
詞推決尚未盡者聽槌登聞鼓宋曰鼓司以內臣掌之鼓在宣

德門南樓北廊至道三年命太子中舍王濟勾當鼓司用朝臣
勾當自此始景德四年詔改為登聞鼓院掌諸上封而進之以

達萬人之情隸諫院正言凡文武臣僚閣門無例通進文字並
先經登聞鼓院進狀未經鼓院者檢院不得收接建炎元年因

舊制置局之闕門之前三年專隸諫院元亦置登聞鼓院掌奏
告御史臺登聞檢院理斷不當之事

言行錄呂申公著謚正獻差判登聞鼓院公研精講學無進
趨之意嘗與王介甫相對而歎曰今天下雖小康然堯舜之道

知其不可復行以故求閑局將以遂其志
中書科

考索漢尚書郎侍直宿建禮門奏事明光殿下筆為誥令乃今
中書舍人也唐武德置舍人六人後改中書舍人龍朔改西臺

舍人光宅改鳳閣舍人開元改紫薇舍人宋初中書舍人為所
遷官實不任職復置知制誥及直舍人院主行辭命封還詞頭

元豐正名遂以中書舍人而判後省之事分案五中興置中書
 後省以中書舍人為長官 漢置通事舍人宋時入直內閣出
 宣誥命齊永平初四員各居一省時謂之四戶權傾天下與給
 事中為一流隋煬帝改為內書舍人唐武德改中書舍人置六
 員自永淳以來天下文章道盛臺閣髦彥無不以文章達故中
 書舍人為文士之極任朝廷之盛選諸官無比 國朝初設直
 省舍人從八品洪武九年改中書舍人正七品後革中書省更
 定為從七品職專書寫誥勅冊符鐵券等事共額設二十員無
 正副推年深者一人掌印其封蔭帶俸及文華武英東西二房
 內閣誥勅制勅二房分直者無常員 文華殿門東房則設中
 書舍人分直職專奉 旨書寫書籍等項武英殿門西房別設

中書舍人分直職專奉 旨寫篆冊寶圖書等項凡 親王之
 國勅符事號赴內閣膳寫底簿赴印綬監收凡 親王郡王并
 妃初授封號合授金冊銀冊寫完仍送銀作局鐫刻 凡內外
 文武官應給誥勅俱於翰林院領寫其新製武官誥命自有織
 定語文請誥續誥俱從兵部徑自送黃填寫
 北史魏收兼中書舍人與溫子昇邢子才齊名世號三才
 舊唐書顏籀字師古唐初為起居舍人遷中書舍人專掌機密
 于時軍國多務凡有制誥皆成其手師古達於政理冊奏之工
 時無及者 常陟與弟武俱有盛名于時才名之士王維崔顥盧
 象等常與陟唱和宋廣平歎曰盛德遺範盡在是矣
 武后天授元年壽春郡王成器兄弟五人初出閣同日受冊有
 司撰儀注忘載冊文及百寮在列方知闕禮宰臣相顧失色中

書舍人王勅立召小吏五人各令執筆口授分寫同時須更俱畢詞理典贍時人歎服

太宗時馬周為中書舍人岑文本嘗稱馬君論事援引事類商確古今舉要刪煩會文切理一字不可增減 唐故事中書

有軍國大事則中書舍人各執所見雜著其名謂之五花判事

開元二年紫薇令姚崇奏紫薇舍人六員每議事請舍人

同簽狀凡事有是非理均與奪人心既異所見或殊抑使雷同情有未盡臣以為執見不同者望請別作連本狀同奏若狀語

交牙恐煩聖思臣既見官長望於兩狀後畧言二理優劣聽進

止則人各盡能官無留事勅曰可

自隋唐以來除改百官必有詔勅蓋領申中書門下省故

人苗延嗣呂太一考功員外郎員嘉靜殿中侍御史崔訓皆位

清要日與議政事故當時稱曰令君四俊苗呂崔員

徐堅西臺舍人齊鼎子也少好學編覽經史聖曆中車駕在三

陽宮御史大夫楊再思左麻子王方慶為東都留守引堅為判

官表奏專以委之方慶賞其文章典寶常稱曰掌綸誥之選也

再思亦曰此鳳閣舍人樣如此才識走避不得 堅長姑為太

宗充容次姑為高宗婕妤好並有文藻堅父子以詞學著聞議者

方之漢世班氏張鷟奏東魏禁禁伏奏青規是泥影影宜

會要書承慶子延休仁約子也補雍王府參軍府中文翰皆出

于承慶辭藻之美擅於一時長壽中果遠鳳閣舍人屬文迅速

雖軍國大事下筆輒成未嘗起草弟嗣立與承慶俱以學行齊

禮之曰不經鳳閣

張嘉貞性簡疏與人不疑所薦中書舍

名長壽中代承慶為鳳閣舍人

蘇頲神龍中拜中書舍人尋而頲父同中書門下三品父子同

掌樞密時以為榮煥事頲委文語皆出頲手中書舍人李嶠曰

舍人思如湧泉嶠所不及也會要蘇頲為舍人高宗曰蘇

王徽曾祖擇從釋從兄易從天后朝登進士第從弟朋從書從

睿宗朝並以進士擢第昆仲四人開元中三至鳳閣舍人故時

人號鳳閣王家孫選開元十年登文舉蘇頲科拜中書舍人議

先及世為王言之最

餘載齊澣開元初姚崇復相用為給事中中書舍人論駁及告

詔皆按準古誼朝廷大政必諮之時號解事舍人陽解為中書

制敕令史待庫鑰他適無舊本檢尋乃斷憲取得之時人號為斷憲舍人

賈曾授中書舍人曾以父名忠固辭議者以為中書是曹司名

又與曾父音同字別於禮無嫌曾乃就職與蘇晉同掌制誥皆

以詞學見知時人稱為蘇賈子至天寶為中書舍人祿山之亂

從上皇幸蜀時肅宗即位於靈武上皇遣至為傳位冊文上皇

覽之歎曰昔先帝遜位於朕冊文則卿之先父所為今朕以神

器大寶付儲君卿又當演誥累朝盛典出卿父子之手可謂難

矣至伏於御前嗚咽感涕

唐書高郢掌誥累年家無制草或謂曰人皆留制草公焚之何

也曰王言不可存私家時人重其慎密王胡獻賦頌每賜予稍

賦字字作金聲何受賜之晚也

六典唐通事舍人宣語多不知書至宣讀輒失句度故用拾遺

團句低聲以助之謂之把麻湘山野錄真宗時日本國入貢求本國神光寺記舍人辭不工令學士張君房代之張退食多潛飲市樓披垣求之不得大窘時種放以司諫歸華山楊大年為閑忙令云世上何人號最閑司諫拂衣歸華山世上何人號最忙紫微失却張君房

國史補太宗嘗云朝廷每除一舍人六親相賀諺云一佛出世

李泌傳給舍分司押事故舍人謂之六押盧氏雜說中舍時目為宰相判官

總卿

釋名卿慶也言萬物皆慶賴之王海卿嚮也言為人所歸嚮也

白虎通卿之為言彰也章善明治也大夫之為言大扶進人者

也故傳曰進賢達能謂之大夫也士者事也任事之稱也故傳

曰通古今辨然否謂之士周禮建外朝之法左九棘孤卿大夫位馬群士在其後右九棘公侯伯男

子位馬群士在其後面三槐三公位馬州長象庶俱在其後

莊子楚昭王失國屠羊說走而從於昭王王謂司馬子綦曰屠

羊說居處卑賤而陳義甚高為我延之以三旌注三旌三公位

也司馬本作三珪謂諸侯之三卿皆執珪

史記虞卿者游說之士也躡躠擔簦說趙孝成王一見賜黃金

百鎰白璧一雙再見為趙上卿故號為虞卿

漢書韋玄成作詩戒示子孫曰明明天子俊德烈烈不遂我遺

恤我九列注九列卿之位

後書更始時其所授官爵者皆郡小賈豎豫章李淑上書諫曰

夫三公上應台宿九卿下括河海惟名與器聖人所重敗財傷

錦所宜至慮

順帝時大司農劉據以職事被譴召詣尚書傳呼促步又加以

八集卷六
周
樞樞左雄上言九卿位亞三事班在大臣行有佩玉之節動有
庠序之儀孝明皇帝始有撲罰皆非古典帝從而改之其後九
卿無復種樞者

北堂書鈔王昶課事云卿考課一曰掌建邦國以考制治二曰
九卿時敏以考敘典三曰經綸國體以考奏議四曰共屬衆職
以考總攝五曰明慎用刑以考留獄也

百官志古者天子諸侯皆名執政大臣曰正卿自周以來始有
三公九卿之號漢世雖號九卿其官無卿字至梁始加卿字梁
又象四時置十二卿後魏依南齊以前置九卿又各加少卿焉
唐龍朔二年加正卿以別少卿

舊唐書麟德二年將有事於泰山有司議依舊禮皆以太常卿
為亞獻光祿卿為終獻劉祥道駁曰昔在三代六卿位重故得
佐祠漢魏以來權歸臺省九卿皆為常伯屬官今登封大禮不
以八座行事而用九卿無乃徇虛名而忘事實乎高宗從其議
竟以司徒徐元禮為亞獻祥道為終獻

韋洪景以直道進議論持正有守當時風教所倚賴為長慶名
卿南史九卿位為列棘作事成務隋表
三公址三星曰九卿內坐主治萬事

大理寺

類聚大理古司刑官也舜命臯陶作士正五刑秦置廷尉掌刑
辟有左右監漢因之景帝更名大理武帝復為廷尉宣帝置左
右廷尉平哀帝復為大理取天宮貴人之牢曰大理之義梁為
秋卿唐因之卿一人少卿二人龍朔改為詳刑寺光宅改為司

刑寺宋大理寺以朝官一員或二員判寺事一員兼少卿事建隆二年以工部尚書竇儀判寺事凡獄訟之事隨官司決効不復聽訊但掌斷天下奏獄送審刑院詳訖同書以上于朝熙寧九年神宗謂國初廢大理獄非是以問孫洙洙對合旨於是下詔以京師官寺凡有獄皆繫開封府司錄司及左右軍巡三院囚逮猥多難於隔訊又暑多瘦死因緣留滯動涉歲時稽參故事宜屬理官可復置大理獄天下奏案刑部審刑院詳斷置卿一少卿二丞四官制行左斷刑右治獄各五案

左廳斷刑曰詳刑詳讞宣黃分

簿奏表右廳治獄曰左推右推寺案知雜檢治

卿掌折獄詳刑鞠獄之事凡職務分左

右天下奏効命官將校及大辟以下以疑請讞者隸左斷刑則司直評事詳斷丞議之正審之若在京百司事當推治或特旨

委勘及係官之初應追究者隸右治獄則丞專推鞠蓋少卿亦領其事而卿總焉建炎二年併省寺監而大理如故省卿而斷刑治獄少卿各一員今大元仍唐宋舊置大理寺掌審斷天下奏案凡刑獄之事以大理卿為之長 後魏置少卿唐置二人宋以朝官一員兼少卿事神宗置大理獄少卿二員以蹇周輔楊汲為之分左斷刑右治獄元仍置大理少卿 大理正周卿師之屬秦置廷尉正一人漢廷尉正監及平謂之廷尉三官秩千石梁服獬豸冠銅印墨綬第六品隋煬帝增置六人唐置二人龍朔改為詳刑大夫光宅中為司刑宋神宗復置大理獄後置寺正元豐五年刑部奏乞分評事司直與正為斷司丞與長貳為議司凡斷案先上正看詳當否論難改正然後過議司復

議元仍置正 後魏永安三年高穆奏置司直十人位在正監
 上不署曹事惟覆理御史檢劾事唐置六人掌承制出使推覆
 若寺有疑獄則參議之宋元豐五年始命程嗣先四人為司直
 建炎三年詔斷刑司直兼治獄司直其治獄司直罷大元仍唐
 宋舊置大理司直 漢宣帝初於廷尉置左右平秩六百石員
 四人光武省右平惟有左平掌平決詔獄冠法冠隋置大理評
 事唐貞觀中褚遂良議重法官奏置評事十員掌出使推覆宋
 熙寧置大理獄至元豐始命張仲穎等十二人為評事大元仍
 置大理評事 國朝置大理寺以六部都通大理為大九卿卿
 正三 左右少卿正四 左右寺丞正五 左右寺正正六 副正六左
 右評事正八 分理庶務焉

